

REGIONAL NEWS BULLETIN

HEADLINES (EVENING)

Date – 28/05/2024

Time - 18:30 -18:40Hrs

- Cyclone Remal avanga thli leh ruah thawk avangin Mizoramah chhiatna nasa tak a thleng a, mi 20 aia tlem lo an thi a, ruang hmuh loh a la awm nual avangin thi zat hi pung chho tura ngaih a ni.
- Mizoram hmun hrang hranga kawlpheha pekna Cyclone Remal-in a tihchhiatte chak taka siamthat hna thawh zel anih thu Power Minister Pu F Rodinglian a sawi
- President Draupadi Murmu, Vice President Jagdeep Dhankar leh Union Home Minister Amit Shah te chuan Cyclone Remal avanga Mizorama thihna thleng chu pawl an tih thu an sawi.



CYCLONE DEATHS

Cyclone Remal avanga thli leh ruah thawk avangin Mizoramah chhiatna nasa tak a thleng a, mi 20 aia tlem lo an thi a, ruang hmuh loh a la awm nual avangin thi zat hi pung chho tura ngaih a ni.

Tukin dar 5:30 bawr vel khan Aizawl Salem Veng, Taitesena, Khurpui rala cheng Pu Laltanpuia te in chu an kawmchhak leimin a hnawl a, an kawmthlang kawrah hnawl thla in, chhiatna a thlen tirh hian he ina chengte hi hmuh zawh an ni lo a, vawiin nilenga khawtlangin an zawn hnuah tlai dar 4 bawr vel khan leimin avanga an ruang hi an hmu ta a ni. Leimin a thi te hi Laltanpuia(41), a nupui Pi Lalhriatpuii (39) leh an fanu Vohbiki (19) te an ni a, an fanu hian nau a pai mek a, thla thar maia nau nei tur nia hriat a ni.

Ruah sur nasa avang hian Melthum leh Hlimen inkar tlang chu tukin dar 5:30 bawr vel khan a chim a, lei chim hian helai bawra cheng Mizo in pathum leh quarry-a thawk hnamdang te chenna in a hnawl chhe vek a, mi 18 velin nunna an chan nia hriat a ni a, hriat theih chunah ruang 13 lak chhuah a ni a, ruang dang zawn mek a ni.

Ruang lak chhuah tawh te hi Pu Lalduhthlanga (66), Pu Thangtluanga (50), Pi Lalduhawmi (34), Pu Lalremtluanga (32), Pi C Lalnunsiami (45), Abel Lalmalsawma (4) Dorothy Lalruatkimi (20), Lalhlimpuii (6), Beetu Manjit, Sanjay Rai, Dilip Manji leh Buva Mesaw Chowduri te an ni.
Ruang zawn hna hi ngawrh taka kalpui a ni.

Falkawnah pawh ZMC Girls Hostel thlang chu nasa taka minin, leimin hian in 5 a hnawl a, Chhungkaw khat a mi Pahnih boral in pakhat ruang la hmuh a ni lo a, helai bawr vela cheng chhungkaw 30 te chuan an chenna in rauhsanin, hmun him zawkah an in suan chhuak tawh ni a thudawn a ni.

Aibawk ah pawh leiminin chenna in pakhat a hnawl a, he ina cheng te nupa a hnawl tel a, zawn mek an ni. Hei bakah hian Kelsih leh Lungsei ah mi 1 ve ve an thi nia thudawn a ni.

Chief Minister Pu Lalduhoma leh Home Minister, Pu K. Sapdanga, Disaster Minister ni bawk te chuan Melthuma chhiatna thlenna hmun vawiin khan an tlawh a. Ruang lak chhuah tawh Melthum Presbyterian Kohhran Hall a dah chu puanin an tuam a, ruang lakchhuah tawh zinga Mizo pariat te chu sawrkar ralna (ex gratia), a hmahruai atan Rs. 200,000 theuh an hlan. Mitthi te aiawh hian Melthum Local Council Chairman Pu Saihmingliana'n a dawng a ni.

Chief Minister Pu Lalduhoma chuan Sawrkar hian mitthi te hi Rs. 400,000 theuhvin a ral dawn tih vawiin khan a puang a, tuna ralna an pek bak a dang hi chhiatna report engkim a fel fai hnuah hlan leh tur a ni. Non-Mizo thi te erawh hi chu an bank account ah thunsak tur a ni ang. Ruang la hmuh loh te pawh lakchhuah an nih veleh ralna hmahruai hi pek nghal mai theihin DM & R Department chuan ruahmanna a siam fel sa vek tawh a ni.

Nizan dar 10:30 vel khan Kolasib Hmarveng a Pi Lalmangaihzuali te chhungkaw chenna In luahlai chu lei tawh in a liam pui a, vanneihthlak takin mihring thi leh hliam an awmlo.

Lei tawh tan tirh hian Pi Hmangaihzuali te chhungkua hi an mu tawh a, lei che in an In a sawi tih a hriat in In neitu nu hian a fate a kai tho vek a, a fate chhuah hnu ah amah hi pawn ah a chhuak fel chiah tih in lei tawh hian an In hi thlang lamah a liam pui ve nghal ani.

Hetihlai hian Kolasib Electric Veng-a Govt DS Gorkha Middle School chu a chhak lam a thing tlu in a delh chhia a, hei pawh hi DC chuan tlawh nghal in, Silpoulin pakhat a pek bakah, hlawhfa la in thing zar hi then fai tir nghal ani.

Cyclone Remal avang hian Kolasib New Diakkawn ah chenna In pakhat chu thing tlu in a delh a, Thingdawl khua ah chenna In pakhat chu thing tlu in delh in, pakhat dang chu In chhak lam lungrem chim in a delh chhe nual bawk a, thi leh hliam an awmlo hlahu ani.

Bairabi Police Station-a police Quarters pakhat chung zatve zet chu thli hian a la a, heng bakah hian Bukpui a Pi

Lallawmkimi te chhungkaw chenna In chung pawh thli hian a len chhe bawk.

Serchhip Dist a Baktawng chan in ah Pu C.Vanlalhruaia in leiminin a hnawl a, mihring taksa tawrhna a thlen lova hriat a ni.

Keitum venglai ah leiminin In 4 dinhmun hlauhawmah a awm a. Chhingchhipah In 31 Chhiahtlang south ah in 10 leimin vangin an buai a. Serchhip AOC Venga lei vung tawlhin a thlang Hmar veng panna orphans home kawng pheii a hnawh a, chhungkaw 6 in an tuar a, Hmar veng a sport complex panna kawng minin chhungkaw 6 bawk hmun ralmuang lovah a awmtir a. Leisang venga Pu Ringzuala in pawh a chhak lama Saberekakhuangkaih in a su buai hle a, Cement concrete in a nih avangin a sir ah chirh tawlh hian a hel deuh a, Job leh mi tlawmngaite puihnain hmangin a thenfai hna thawh mek a ni.

New Serchhip north ah leiminin In 5 dinhmun hlauhawmah awmtirin East Lungdarah In 2 leh Rullamah In pakhat thli vangin a then lai a chhe bawk. Tin, NH-54 Serchhip leh Keitum inkarah leiminin kawngpui a hnawh a.P&E veng leh IOC veng inkar khaw chung kawng leiminin a hnawh a. Mat lui lianin Zawlpui leilet zawl leh Serchhip thlai chinna hmunpui a chim mek a. Nizan dar 11 vel atanga power supply la awm lo leh phone thenkhat signal tihnun loh vangin mipui in harsatna an tawk a. Bazar leh dawr vel pawh inhawng an awm meuh lo niin kan corr chuan a sawi a ni. Mamit district chung khaw hrang hrangah chhiatna thleng bawk a.

Mamit DC office, DM&R cell atanga thudawn danin hriattheih chinah nimin leh vawiin lama ruahsur leh thlipui avang hian khaw hrang hrangah chhiatna a thleng nual a, thli tleh avangin Mamit High school veng, Bawngva leh Tuirum khuaah te chhungkaw 1 chenna in theuh a tichhia a, ruahsur nasat avangin hmun hrang hrangah leimin awmin National Highway 108 pawh Rawpuichhip khaw daiah a hnawhping a, PWD yen an thianfai tawh thung a ni.

Tun ruahsur nasat avang hian Langkaih leh Tut lui te chu a lian nasa hle a, Langlaih lui len vang hian Zawlnuam Bawrai veng a chhungkaw 10 te chu an inthiarchhuak tawh a, tin

chhungkaw 18 te chu tui len belh a inthiarchhuak turin an inralring bawk a, tui lian hian Zawlnuam Bawrai vengchhung inkalpawhna lei (Bridge) 1 leh Tripura nen a an inkalpawhna temporary bridge 1 chu a chim pil tawh bawk a ni.

Tut lui lian hian a kam deuh lawk a awm Phaizau khua la chim thleng lo mahse an eizawna lui kam nul (thlai chinna) leh tuikhuah a tichhe nasa hle bawk a ni.

Thli leh ruahsur nasat avang hian Pathianni zan atang khan Mamit khawpuiah kawlphehtha/electric ala awmlo a, zanin pawh hian a awm hman ala beisei awm loh. Mamit khawpui chhunga electric hrui bakah W Phaileng electric sub station atanga electric lakna hrui te chu thli tleh avanga thing tlu in a delh chhe nasa hle bawk a ni.

Cyclone Remal avanga chhiatna thleng report kan correspondent Rodi Lalremruati Zote hnen atangin I lo ngaithlang.



P&E MINISTER

Power Minister Pu F. Rodinglana chuan Mizoram hmun hrang hranga kawlphehtha pekna Cyclone Remal-in a tihchhiate chak taka siamthat hna thawh zel theih nan Department hotute emergency meeting a neihpui a. Aizawl khawchhunga khawl leh line chhe tam tak chu tukin atang khan ruahsur leh leimin karah siam that hna thawh nghal niin, hmun thenkhat erawh leimin leh ruah sur nasat avanga siam mai harsa awm mahse Department staff ten theihtawpin hna an thawk mek a ni.

Cyclone Remal vang hian tun dinhmuna report dawn danin Aizawl-ah ringawt pawh Feeder 33 zet chawmtu Power Substation hmun 10 lai a chhiat avangin veng 60 chuang eng nei lovin an awm a, transformer dahna minin transformer a minpui tel te leh panel board engemaw zat chhia report dawn a ni bawk.

Aizawl khawpui chung bakah Mizoram hmun hrang hrang atanga report dawn danin Mamit District ah electric ban leh 33kV line leh 11kV line chhia te, Kolasib District ah 132kV, 33kV leh 11kV engemaw zat chhia te a awm a, meeting huaihawt nih lai thleng hian Mizoram chhim lama District 3 Lunglei, Lawngtlai leh Siaha te eng pek theih a la ni lo. Chhim lam line pek Serchhip District erawh Siatual(via East Lungdar) atangin power pek tawh niin, hmun dang pawh hetiang hian a theih dan ang anga hma lak zel tum a ni.

Minister chuan hmanrua indaihlo te hmun hrang hrang atanga lak khawm dan ngaihtuah a, a tul anga RDSS scheme atang te pawha hmanrua lo pawh a, a rang lama siamthat hna thawh chhonzawm nan hian sum te pawh a awm ang ang zawn nghal ni se a ti a. Hei bakah hianin LT leh HT line chhia hmun tam takah a awm avangin sum awm lo chung pawh a tihdan kawng zawn zel a ni ang a ti. P&E Dept. thawktuten ruahsur karah pawh mahni nunna tana hlauhawm khawpa an thawhnaah lawmthu a sawi a, Department lamin theihtawp chhuaha chawl lova hna an thawh thu hre reng chungin, mipuite pawhin dawhthei taka hrethiam turin a ngen a ni.

Customer Care Centre(CCC) tangkai zawka hman dan tur rel nghal niin, vawiin meeting hi Pu H. Zonunsanga, Engineer-in-Chief, P&E Dept., leh P&E Dept. official dang te nen Power Minister Pu F. Rodinglana chenna inah neih a ni.



PRESIDENT, VICE PRESIDENT AND UNION HM

President Draupadi Murmu, Vice President Jagdeep Dhankar leh Union Home Minister Amit Shah te chuan Cyclone Remal avanga Mizorama thihna thleng chu pawh an tih thu an sawi. President Draupadi Murmu chuan vawiin khan social media-ah thli tleh leh ruahsur avanga nunna chante a tawrhpuh thu a sawi a. Lusun chungte a tawrhpuh thu leh a tawngtaipui reng thu sawiin chhanchhuah hna chak taka thawh anih theih nan duhsakna a hlan a ni.

Vice President Jagdeep Dhankar pawhin Aizawl Hlimen-a chenna in leiminin a hnawla thi te a tawrhpuithu leh hliam tuarte pawh an dam leh thuai theihnan duhsakna a hlan a. Union Home Minister Amit Shah pawhin vanduaina tawkte a tawrhpuithu social media lamah a tarlang bawka ni.

<><><>